

გაკვეთილი 15

საქართველოს საგადასახადო

კოდექსი

საშემოსავლო გადასახადი

ნაწილი 2

თავი XII სპეციალური დაბეგვრის რეჟიმები

მუხლი 83. სპეციალური დაბეგვრის რეჟიმები

სპეციალური დაბეგვრის რეჟიმები ვრცელდება:

- ა) მიკრო ბიზნესის სტატუსის მქონე ფიზიკურ პირებზე;
- ბ) მცირე ბიზნესის სტატუსის მქონე მეწარმე ფიზიკურ პირებზე.

საგადასახადო კანონმდებლობა განსაზღვრავს სპეციალური დაბეგვრის რეჟიმებს, რომელიც ვრცელდება მიკრო ან მცირე ბიზნესის სტატუსი, ასევე - ფიქსირებული გადასახადის გადამხდელის სტატუსის მქონე პირებზე. მიკრო ბიზნესის სტატუსი ენიჭება გადასახადის გადამხდელად რეგისტრირებულ ფიზიკურ პირს. ამ სტატუსის მისანიჭებლად არ არის სავალდებულო პირი იყოს რეგისტრირებული მეწარმე ფიზიკურ პირად. მიკრო ბიზნესის სტატუსი შეიძლება მიენიჭოს ფიზიკურ პირს, რომელიც აკმაყოფილებს შემდეგ მოთხოვნებს: არ იყენებს დაქირავებულ პირთა შრომას; დამოუკიდებლად ეწევა ეკონომიკურ საქმიანობას და მიერ კალენდარული წლის განმავლობაში მისაღები ჯამური ერთობლივი შემოსავალი არ აღემატება 30 000 ლარს.

სპეციალური დაბეგვრის რეჟიმები ვრცელდება მცირე ბიზნესის სტატუსის მქონე მეწარმე ფიზიკურ პირებზეც. მცირე ბიზნესის სტატუსი შეიძლება მიენიჭოს მეწარმე ფიზიკურ პირს, რომლის მიერ ეკონომიკური საქმიანობიდან მიღებული ერთობლივი შემოსავალი კალენდარული წლის განმავლობაში არ აღემატება 100 000 ლარს.

რაც შეეხება ფიქსირებული გადასახადის გადამხდელს, ის შეიძლება იყოს პირი, რომელიც არ არის დამატებული ღირებულების გადასახადის გადამხდელი და ახორციელებს ფიქსირებული გადასახადით დასაბეგრ ერთ ან ერთზე მეტ საქმიანობას. ფიქსირებული გადასახადით დაბეგვრის ობიექტს საქმიანობის სახეების მიხედვით განსაზღვრავს საქართველოს მთავრობა.

მუხლი 84. მიკრო ბიზნესი

1. მიკრო ბიზნესის სტატუსი შეიძლება მიენიჭოს ფიზიკურ პირს, რომელიც არ იყენებს დაქირავებულ პირთა შრომას და დამოუკიდებლად ეწევა ეკონომიკურ საქმიანობას, რომლიდანაც მის მიერ მისაღები ჯამური ერთობლივი შემოსავალი კალენდარული წლის განმავლობაში არ აღემატება 30 000 ლარს.
2. ამ მუხლის პირველი ნაწილით დადგენილი 30 000-ლარიანი ზღვარი არ ვრცელდება საქართველოს პარლამენტის საფინანსო-საბიუჯეტო კომიტეტთან შეთანხმებით საქართველოს მთავრობის მიერ განსაზღვრულ საქმიანობის სახეებზე.
3. საქართველოს პარლამენტის საფინანსო-საბიუჯეტო კომიტეტთან შეთანხმებით, საქართველოს მთავრობას უფლება აქვს, აკრძალოს ცალკეული საქმიანობის განხორციელება, რომლის ფარგლებშიც მიკრო ბიზნესის სტატუსი არ შეიძლება მიენიჭოს ფიზიკურ პირს.
4. საქართველოს პარლამენტის საფინანსო-საბიუჯეტო კომიტეტთან შეთანხმებით, საქართველოს მთავრობას უფლება აქვს, განსაზღვროს შემოსავლის სახეები, რომლებიც არ დაიბეგრება სპეციალური დაბეგვრის რეჟიმით და ამ მუხლის პირველი ნაწილის მიზნებისათვის არ გაითვალისწინება ერთობლივ შემოსავალში.
5. მიკრო ბიზნესის სტატუსის მინიჭება, გაუქმება და მიკრო ბიზნესის სერტიფიკატის გაცემა ხდება საქართველოს ფინანსთა მინისტრის მიერ დადგენილი წესით.

მიკრო ბიზნესის სტატუსი შეიძლება მიენიჭოს ფიზიკურ პირს, რომელიც არ იყენებს დაქირავებულ პირთა შრომას და დამოუკიდებლად ეწევა ეკონომიკურ საქმიანობას, რომლიდანაც მის მიერ მისაღები ჯამური ერთობლივი შემოსავალი კალენდარული წლის განმავლობაში არ აღემატება 30 000 ლარს. მიკრო ბიზნესის სტატუსის მინიჭებისათვის მთავას პირობას წარმოადგენს ის, რომ ფიზიკური პირს არ უნდა ჰყავდეს დაქირავებული ფიზიკური პირები შრომის კანონმდებლობის შესაბამისად, თუმცა მას უფლება აქვს, მომსახურების/ნარდობის ხელშეკრულებები დადოს სხვა იურიდიულ თუ ფიზიკურ პირებთან. ასევე შესაძლებელია მიკრო ბიზნესის სტატუსის მიღება იმ შემთხვევაშიც კი თუ მეწარმე ფიზიკური პირის წლიური შემოსავალი აღემატება 30 000, იმ შემთხვევაში თუ პირი დაკავებულია ქვემოთ მოყვანილი საქმიანობით: სასოფლო-სამეურნეო პროდუქციის მოყვანა, რომელიც ხორციელდება ტრაქტორებით ან კომბაინებით; ხალიჩებისა და ორბოვისებრი ნაწარმის წარმოება; პულოვერებისა და ანალოგიური ნაწარმის წარმოება; ტანსაცმლის წარმოება, გარდა მოდელების დემონსტრირებისა და ჩვენებისა; და სხვა.

საყოფაცხოვრებო საქონლისა და პირადი მოხმარების საგნების რემონტი/შეკეთება; საყოფაცხოვრებო საქონლისა და პირადი მოხმარების საგნების რემონტი/შეკეთება, თუ ის ხორციელდება ამ საგნების წარმოების, საბითუმო და საცალო ვაჭრობისაგან დამოუკიდებლად, თუ რემონტი/შეკეთება ხორციელდება საქმიანობის სხვა სახეობებთან ერთად, მაშინ იგი განეკუთვნება საცალო და საბითუმო ვაჭრობის ან ამ საქონლის წარმოების შესაბამის დაჯგუფებებს; ფეხსაცმლისა და ტყავის ნაწარმის რემონტი/შეკეთება;

საყოფაცხოვრებო ელექტრონული ნაწარმის რემონტი/შეკეთება;

30 000 ლარიანი ზღვარი არ ვრცელდება საქართველოს პარლამენტის საფინანსო-საბიუჯეტო კომიტეტთან შეთანხმებით საქართველოს მთავრობის მიერ განსაზღვრულ საქმიანობის სახეებზე. საქართველოს პარლამენტის საფინანსო-საბიუჯეტო კომიტეტთან შეთანხმებით საქართველოს მთავრობას უფლება აქვს განსაზღვროს შემოსავლის სახეები, რომლებიც არ დაიბეგრება სპეციალური დაბეგვრის რეჟიმით და არ გაითვალისწინება ერთობლივ შემოსავალში. მიკრო ბიზნესის სტატუსის მინიჭება, გაუქმება და მიკრო ბიზნესის სერთიფიკატის გაცემა ხდება საქართველოს ფინანსთა მინისტრის მიერ დადგენილი წესით.

მუხლი 85. მიკრო ბიზნესის სტატუსის მინიჭება

1. ფიზიკური პირი, რომელიც აკმაყოფილებს ამ კოდექსის 84-ე მუხლით დადგენილ პირობებს, უფლებამოსილია მიკრო ბიზნესის სტატუსის მინიჭების მიზნით მიმართოს საგადასახადო ორგანოს საგადასახადო აღრიცხვის ადგილის მიხედვით, რისთვისაც გაცემა მიკრო ბიზნესის სერთიფიკატი.

2. მიკრო ბიზნესის სტატუსი მიმდინარე საგადასახადო წელს უქმდება, თუ:

ა) ფიზიკურმა პირმა საგადასახადო ორგანოს მიმართა მიკრო ბიზნესის სტატუსის გაუქმების ან მცირე ბიზნესის სტატუსის მინიჭების მოთხოვნით;

ბ) საგადასახადო ორგანოს მიერ ჩატარებული ინვენტარიზაციის შედეგად დადგინდა, რომ მიკრო ბიზნესის სტატუსის მქონე ფიზიკური პირის სასაქონლო-მატერიალური მარაგების ნაშთი აღემატება 45 000 ლარს.

3. თუ მიკრო ბიზნესის სტატუსის მქონე ფიზიკური პირი ამ კოდექსის 84-ე მუხლის პირველი ნაწილით დადგენილი მოთხოვნის (ერთობლივი შემოსავლის ოდენობის შეზღუდვა) დარღვევიდან 15 დღის ვადაში არ მიმართავს საგადასახადო ორგანოს მცირე ბიზნესის სტატუსის მინიჭების მიზნით, მას გაუუქმდება მიკრო ბიზნესის სტატუსი და გამოვა სპეციალური დაბეგვრის რეჟიმიდან.

4. საგადასახადო ორგანოს მიერ მიკრო ბიზნესის სტატუსის გაუქმების და სპეციალური დაბეგვრის რეჟიმიდან გამოსვლის საფუძველია ფიზიკური პირის მიერ ამ კოდექსის 84-ე მუხლის მე-3 ნაწილის მოთხოვნის დარღვევა.

5. ფიზიკური პირისათვის მინიჭებული მიკრო ბიზნესის სტატუსის გაუქმების შემთხვევაში ამ მომენტისთვის ფიზიკური პირის შემოსავალი ექვემდებარება დაბეგვრას სტატუსის გაუქმების თაობაზე გადაწყვეტილების მიღებიდან 30 კალენდარული დღის ვადაში:
ა) მცირე ბიზნესის სტატუსის მიღების შემთხვევაში – მცირე ბიზნესისთვის დადგენილი წესის შესაბამისად;

თუ ფიზიკური პირი, არ იყენებს დაქირავებულ პირთა შრომას და დამოუკიდებლად ეწევა ეკონომიკურ საქმიანობას, რომლიდანაც მიღებული შემოსავალი წლის განმავლობაში არ აღემატება 30 000 ლარს, მას შეუძლია მიმართოს საგადასახადო ორგანოს მიკრო ბიზნესის სტატუსის მინიჭების მოთხოვნით. მიკრო ბიზნესი სტატუსის დასტურად გაცემა სერთიფიკატი. სტატუსი ძალაშია სერთიფიკატის გაცემის დღიდან, მაგრამ მიეკუთვნება მთლიან კალენდარულ წელს. მიკრო ბიზნესის სტატუსი უქმდება : ა) ფიზიკური პირის შესაბამისი განცხადებით. განცხადება შეიძლება ეხებოდეს მცირე ბიზნესის სტატუსის მინიჭებასაც; ბ) თუ ინვენტარიზაციით დადგინდა, რომ ფიზიკური პირის სასაქონლო-მატერიალური მარაგების ნაშთი აღემატება 45 000 ლარს. სტატუსის მქონეს შეიძლება არ ჰქონდეს შეძენის დამადასტურებელი დოკუმენტაცია, შესაბამისად, შეუძლებელი იქნება მარაგების თვითღირებულებითი შეფასება. ამიტომაც საგადასახადო ორგანომ მარაგების ნაშთი უნდა შეაფასოს სავარაუდო შესყიდვის, და არა გაყიდვის ფასად. არის რისკი იმისა, რომ საკუთარი სახლის მშენებლობისათვის განკუთვნილი სამშენებლო მასალებიც ჩართული იყოს სასაქონლო-მატერიალურ მარაგებში;

მუხლი 86. მიკრო ბიზნესის გადასახადისაგან გათავისუფლება

მიკრო ბიზნესის სტატუსის მქონე ფიზიკური პირი არ იხდის საშემოსავლო გადასახადს.

მიკრო ბიზნესის სტატუსის მქონე პირი გათავისუფლებულია საშემოსავლო გადასახადისგან ყველა იმ შემოსავლის სახეზე, რომელიც მიღებულია ეკონომიკური საქმიანობით და არ განეკუთვნება კანონით გათვალისწინებულ სხვა შემოსავლებს.

მუხლი 87. მიკრო ბიზნესის ვალდებულებები

1. მიკრო ბიზნესის სტატუსის მქონე პირი პირველადი საგადასახადო დოკუმენტის გამოწერისას ვალდებულია დოკუმენტში მიუთითოს თავისი სტატუსის შესახებ და სტატუსის სერთიფიკატის ნომერი.
2. მიკრო ბიზნესის სტატუსის მქონე პირი მისთვის ან მის მიერ პირველადი საგადასახადო დოკუმენტის გამოწერის შემთხვევაში ვალდებულია შეინახოს აღნიშნული დოკუმენტი.

საგადასახადო კანონმდებლობა აკისრებს გარკვეულ ვალდებულებას მიკრო ბიზნესის სტატუსის მქონე პირს. კერძოდ, მიკრო ბიზნესის სტატუსის მქონე პირმა მის მიერ გამოწერილ პირველად საგადასახადო დოკუმენტში უნდა მიუთითოს როგორც სტატუსი, ასევე - სტატუსის სერთიფიკატის ნომერი. მიკრო ბიზნესის სტატუსის მქონე პირი ვალდებულია 6 წლის განმავლობაში შეინახოს მიღებული ან გაცემული პირველადი საგადასახადო დოკუმენტაცია. შენახვის თაობაზე დაკისრებული ვალდებულების გარდა, მას ეს დოკუმენტაცია გამოადგება მაშინაც, თუ მისი სტატუსი შეიცვლება. თუ კონტრაგენტი საქონელს ყიდულობს როგორც მეწარმე, მაშინ მიკრო ბიზნესის სტატუსის მქონე პირს იმპერატიულად ევალება სასაქონლო ზედნადების შექმნა და მყიდველისათვის წარდგენა მიუხედავად იმისა, რომ სტატუსის მქონე გამყიდველს საგადასახადო სანქცია არ დაეკისრება მისი წარუდგენლობისათვის.

მუხლი 88. მცირე ბიზნესი

1. მცირე ბიზნესის სტატუსი შეიძლება მიენიჭოს მეწარმე ფიზიკურ პირს, რომლის მიერ ეკონომიკური საქმიანობიდან მიღებული ერთობლივი შემოსავალი კალენდარული წლის განმავლობაში არ აღემატება 100 000 ლარს.
2. საქართველოს პარლამენტის საფინანსო-საბიუჯეტო კომიტეტთან შეთანხმებით, საქართველოს მთავრობას უფლება აქვს, აკრძალოს ცალკეული საქმიანობის განხორციელება, რომლის ფარგლებშიც მცირე ბიზნესის სტატუსი არ შეიძლება მიენიჭოს მეწარმე ფიზიკურ პირს.
3. საქართველოს პარლამენტის საფინანსო-საბიუჯეტო კომიტეტთან შეთანხმებით, საქართველოს მთავრობას უფლება აქვს, განსაზღვროს შემოსავლის სახეები, რომლებიც არ დაიბეგრება სპეციალური დაბეგრის რეჟიმით და რომელიც ამ მუხლის პირველი ნაწილის მიზნებისათვის არ გაითვალისწინება ერთობლივ შემოსავალში.

მცირე ბიზნესის სტატუსი შეიძლება მიენიჭოს მეწარმე ფიზიკურ პირს, რომლის მიერ ეკონომიკური საქმიანობიდან მიღებული ერთობლივი შემოსავალი კალენდარული წლის განმავლობაში არ აღემატება 100 000 ლარს. თუ მიკრო ბიზნესის სტატუსი შეიძლება მინიჭებოდა არამეწარმე ფიზიკურ პირს, მცირე ბიზნესის სტატუსი შეიძლება მიენიჭოს მხოლოდ იმ ფიზიკურ პირს, რომელიც მეწარმეა, ამასთან, ეს პირი უნდა იმყოფებოდეს საგადასახადო აღრიცხვაზე. თუ მიკრო ბიზნესის სტატუსისთვის ეკონომიკური საქმიანობით მიღებული ერთობლივი შემოსავლების ზღვარი იყო 30 000 ლარი, მცირე ბიზნესისთვის ეს ზღვარია 100 000 ლარი. თუ მეწარმე ფიზიკური პირი ეწევა ან გასწევს აკრძალულ საქმიანობას, მაშინ მას არ მიენიჭება, ხოლო მინიჭების შემთხვევაში - გაუქმდება, მცირე ბიზნესის სტატუსი. მიკრო ბიზნესისგან განსხვავებით, მცირე ბიზნესის სტატუსის მქონეს, სტატუსის გაუქმების გარეშე, შეუძლია განახორციელოს საქონლის ყიდვა-გაყიდვა (ვაჭრობა). სამაგიეროდ, მისი ისეთი საქმიანობა, როგორცაა სამედიცინო, არქიტექტურული, საადვოკატო ან სანოტარო, სააუდიტო, საკონსულტაციო, კვლავ ითვლება სტატუსის გაუქმების საფუძვლად. ეს ისეთი საქმიანობებია, რომელთა განხორციელებისას ფიზიკური პირი ითვლება მეწარმედ. გამომდინარე აქედან, თუ ფიზიკური პირი ეწევა სახელოვნებო, სამეცნიერო, სასოფლო-სამეურნეო ან სატყეო-სამეურნეო საქმიანობას, ის აითვლება მეწარმედ და შეუძლია მიმართოს საგადასახადო ორგანოს მცირე ბიზნესის სტატუსის მინიჭებისათვის. მცირე ბიზნესის სტატუსით გათვალისწინებული დაბეგრის რეჟიმი მოქმედებს საქართველოში არსებული წყაროდან მიღებულ შემოსავლებზე და არა ფარგლებს გარედან მიღებულზე. საქართველოს პარლამენტის საფინანსო-საბიუჯეტო კომიტეტთან შეთანხმებით, საქართველოს მთავრობას უფლება აქვს, აკრძალოს ცალკეული საქმიანობის განხორციელება, რომლის ფარგლებშიც მცირე ბიზნესის სტატუსი არ შეიძლება მიენიჭოს მეწარმე ფიზიკურ პირს.

მუხლი 89. მცირე ბიზნესის სტატუსის მინიჭება

1. მეწარმე ფიზიკური პირი, რომელიც აკმაყოფილებს ამ კოდექსის 88-ე მუხლის მოთხოვნებს, უფლებამოსილია მცირე ბიზნესის სტატუსის მინიჭების მიზნით მიმართოს საგადასახადო ორგანოს საგადასახადო აღრიცხვის ადგილის მიხედვით.
2. მცირე ბიზნესის სტატუსი მიმდინარე საგადასახადო წელს უქმდება, თუ:
 - ა) მეწარმე ფიზიკურმა პირმა საგადასახადო აღრიცხვის ადგილის მიხედვით საგადასახადო ორგანოს არა უგვიანეს საგადასახადო წლის დასრულებისა მიმართა მცირე ბიზნესის სტატუსის გაუქმების მოთხოვნით;
 - ბ) დაირღვა ამ კოდექსის 88-ე მუხლის პირველი ნაწილის მოთხოვნა (ერთობლივი შემოსავლის ოდენობის შეზღუდვა);
 - გ) მეწარმე ფიზიკურ პირს წარმოემვა დამატებული ღირებულების გადასახადის გადამხდელად სავალდებულო რეგისტრაციაზე დადგომის ვალდებულება;

დ) საგადასახადო ორგანოს მიერ ჩატარებული ინვენტარიზაციის შედეგად გამოვლინდა, რომ მცირე ბიზნესის სტატუსის მქონე მეწარმე ფიზიკური პირის სასაქონლო-მატერიალური მარაგების ნაშთი აღემატება 150 000 ლარს.

3. საგადასახადო ორგანოს მიერ მცირე ბიზნესის სტატუსის გაუქმების და სპეციალური დაბეგვრის რეჟიმიდან გამოსვლის საფუძველია:

ა) მეწარმე ფიზიკური პირის მიერ ამ კოდექსის 88-ე მუხლის მე-2 ნაწილით გათვალისწინებული საქმიანობის განხორციელება;

ბ) მეწარმე ფიზიკური პირისთვის საკონტროლო-სალარო აპარატების გამოუყენებლობისათვის სანქციის კალენდარული წლის განმავლობაში 3-ჯერ დაკისრება.

4. თუ მცირე ბიზნესის სტატუსის მქონე მეწარმე ფიზიკური პირის ერთობლივი შემოსავალი კალენდარული წლის განმავლობაში გადააჭარბებს 100 000 ლარს და მოეხსნება სტატუსი, მას უფლება აქვს, კვლავ მიიღოს სტატუსი ყველა შემდეგი პირობის დაკმაყოფილების შემთხვევაში:

ა) თუ სტატუსის გაუქმებიდან მომავალი 12 კალენდარული თვის განმავლობაში განხორციელებული დასაბეგრი ოპერაციების საერთო თანხა არ აღემატება 100 000 ლარს;

ბ) ამ ნაწილის „ა“ ქვეპუნქტის გათვალისწინებით, სტატუსის გაუქმებიდან 12 კალენდარული თვის მომდევნო წლიდან, თუ პირი არ არის დამატებული ღირებულების გადასახადის გადამხდელი.

მეწარმე ფიზიკურ პირს მცირე ბიზნესის სტატუსს ანიჭებს საგადასახადო ორგანო სერტიფიკატის გაცემითა და ინსტრუქციით მოცემული წესების შესაბამისად. სტატუსს პირი კი იძენს მიმართვიდან განსაზღვრულ ვადაში (2 დღე), მაგრამ სტატუსიდან გამომდინარე, დაბეგვრის სპეციალური რეჟიმი პირისათვის მოქმედებს სტატუსის მინიჭების კალენდარული წლის დასაწყისიდან სტატუსის გაუქმებამდე. ამასთან, სტატუსი ძალაშია შემდგომი კალენდარული წლებისათვისაც, თუ ის არ გაუქმდა. მცირე ბიზნესის სტატუსის გაუქმების საფუძველი შეიძლება იყოს : 1) მეწარმე ფიზიკური პირის მიმართვა საგადასახადო ორგანოსათვის მცირე ბიზნესის სტატუსის გაუქმების მოთხოვნით; 2) მცირე ბიზნესის სტატუსის მინიჭებისათვის დადგენილი მოთხოვნების დარღვევა; 3) მეწარმე ფიზიკური პირის დარეგისტრირება დამატებული ღირებულების გადასახადის გადამხდელად; 4) საგადასახადო ორგანოს მიერ ინვენტარიზაციის ჩატარება, თუ ამის შედეგად გამოვლინდა, რომ მცირე ბიზნესის სტატუსის მქონე მეწარმე ფიზიკური პირის სასაქონლო-მატერიალური მარაგების ნაშთი აღემატება 150 000 ლარს. რაც შეეხება სტატუსის ხელახალ მინიჭებას, თუ პირი აკმაყოფილებს კანონით დადგენილ მოთხოვნებს, ეს შესაძლებელია ნებისმიერ დროსა და ნებისმიერი კალენდარული წლისათვის, მაგრამ არის გამონაკლისიც – როდესაც სტატუსის გაუქმების საფუძველი იყო ერთობლივი შემოსავლების 100 000 ლარიანი ზღვრის გადაჭარბება. ამ დროს სტატუსის აღდგენა შესაძლებელია მხოლოდ გარკვეული ორი მოთხოვნის დაკმაყოფილების შემთხვევაში. სტატუსის ხელახალი მინიჭება შესაძლებელია მხოლოდ სტატუსის გაუქმებიდან 12 კალენდარული თვის შემდგომი წლიდან. პირველი მოთხოვნაა – სტატუსის გაუქმების კონკრეტული თარიღიდან, და არა - გაუქმების წლის დამთავრებიდან, შემდგომი 12 კალენდარული თვის განმავლობაში დასაბეგრი ოპერაციების საერთო თანხა ნაკლები უნდა იყოს 100 000 ლარზე. მეორე მოთხოვნაა – დღგ-ის გადამხდელად რეგისტრაციის არარსებობა.

მუხლი 90. მცირე ბიზნესის დასაბეგრი შემოსავალი და გადასახადის განაკვეთ ებ ი

1. მცირე ბიზნესის დასაბეგრი შემოსავალი, გარდა ამ მუხლის მე-2 ნაწილით გათვალისწინებული შემთხვევისა, იბეგრება 5 პროცენტით.

2. მცირე ბიზნესის დასაბეგრი შემოსავალი იბეგრება 3 პროცენტით, თუ:

ა) მცირე ბიზნესის სტატუსის მქონე მეწარმე ფიზიკურ პირს აქვს ერთობლივი შემოსავლის მიღებასთან დაკავშირებული ერთობლივი შემოსავლის 60 პროცენტის ოდენობის ხარჯების

(გარდა დაქირავებულზე დარიცხული ხელფასის ხარჯისა) დამადასტურებელი დოკუმენტები;

ბ) მცირე ბიზნესის სტატუსის მქონე მეწარმე ფიზიკური პირი საქმიანობს მხოლოდ სპეციალური სავაჭრო ზონის ტერიტორიაზე.

3. მცირე ბიზნესის დასაბეგრი შემოსავალი შედგება საქართველოში არსებული წყაროდან მიღებული ერთობლივი შემოსავლებისაგან, გარდა ხელფასის სახით მიღებული შემოსავლებისა.

საშემოსავლო გადასახადის დასაბეგრი ბაზაა მცირე ბიზნესის სტატუსის მქონე ფიზიკური პირის მიერ საქართველოში არსებული წყაროდან მიღებული ერთობლივი შემოსავლები, გარდა ხელფასის სახით მიღებული შემოსავლებისა. დასაბეგრ ბაზაში მონაწილეობას არ იღებს საქართველოს ფარგლებს გარეთ მიღებული შემოსავლები. აღნიშნული შემოსავლები ჩვეულებრივ დაბეგვრის რეჟიმისას ისედაც გათავისუფლებულია საშემოსავლო გადასახადისაგან.

მცირე ბიზნესის სტატუსისას საშემოსავლო გადასახადის ძირითადი საპროცენტო განაკვეთი განსაზღვრულია 5%-ის ოდენობით. მაგრამ არსებობს გამონაკლისი შემთხვევაში, როდესაც მცირე ბიზნესის დასაბეგრი შემოსავალი იბეგრება 3 პროცენტით. ეს ხდება იმ შემთხვევაში, თუ მცირე ბიზნესის სტატუსის მქონე მეწარმე ფიზიკურ პირს აქვს ერთობლივი შემოსავლის მიღებასთან დაკავშირებული ერთობლივი შემოსავლის 60 პროცენტის ოდენობის ხარჯების დამადასტურებელი დოკუმენტები.